



ԲՆԱՊԱՀՊԱՆՈՒԹՅԱՆ ԵՎ ԸՆԴԵՐՔԻ ՏԵՍՉԱԿԱՆ ՄԱՐՄԻՆ

Ո Ր Ո Շ ՈՒ Մ № Գ/01-20

վարչական տույժ նշանակելու մասին

20 «փետրվարի» 2024 թվականի

քաղաք Երևան

ՀՀ բնապահպանության և ընդերքի տեսչական մարմնի (այսուհետ՝ Տեսչական մարմին) Գեղարքունիքի տարածքային բաժնի պետ Ա. Ղուկասյանս՝ քննության առնելով «Գեոպրոմայնինգ գոլդ» սահմանափակ պատասխանատվությամբ ընկերության գլխավոր տնօրեն Անատոլի Վիկտորի Գոգոտինի (անձնագիր՝ 550512113, տրված՝ 01.04.2021թ. Ռուսաստանի Դաշնության ԱԳՆ-ի 37401-ի կողմից, հասցե՝ ք. Երևան, Սարմինե փողոց, տուն 70) նկատմամբ հարուցված վարչական իրավախախտման վերաբերյալ գործի նյութերը,

Պ Ա Ր Զ Ե Ց Ի

Տեսչական մարմնի ղեկավարի 2023 թվականի մարտի 27-ի «Ստուգում իրականացնելու մասին» թիվ 63-Ա հանձնարարագրի հիման վրա 2023 թվականի մայիսի 18-ից մինչև 2024 թվականի հունվարի 9-ը իրականացվել է ստուգում «Գեոպրոմայնինգ գոլդ» սահմանափակ պատասխանատվությամբ ընկերությունում՝ (այսուհետ՝ Ընկերություն, ՀՎՀՀ 01530525) Գեղարքունիքի մարզ, Վարդենիս համայնք, Սոթքի հանքավայր և Արարատի մարզ, քաղաք Արարատ, Սարալանջի 1 հասցեներում:

Տեսչական մարմնի կողմից ստուգման արդյունքներով 2024 թվականի փետրվարի 7-ին կազմվել է թիվ 63 ստուգման ակտը (այսուհետ՝ նաև Ստուգման ակտ), որի համաձայն՝ հայտնաբերվել են հետևյալ խախտումները.

Ընկերության Սոթքի ոսկու հանքը 2016 թվականի հունվարի 1-ից մինչև 2022 թվականի դեկտեմբերի 31-ը ներառյալ N40 հանքուղուց արտահոսող հանքաջրերը տեղափոխում է բետոնյա բաց հունով մինչև Սոթք գետի ձախ ափամերձ հատված,

որտեղ միանալով մետաղյա խողովակին՝ տեղափոխվում է պարզարան: Միացման հատվածից և մետաղական խողովակից տեղի է ունեցել հանքաջրերի արտահոսք Սոթք գետ՝ տվյալ հատվածից չունենալով ՋԹ (ըստ Ընկերության կողմից տրամադրված փաստաթղթերի և համաձայն տեղում կազմված արձանագրության և լուսանկարների):

Նշվածով խախտվել է Հայաստանի Հանրապետության ջրային օրենսգրքի 21-րդ հոդվածի պահանջը, Հայաստանի Հանրապետության ընդերքի մասին օրենսգրքի 59-րդ հոդվածի 3-րդ մասի 11-րդ կետի պահանջները: Սույն իրավախախտման համար պատասխանատվություն է նախատեսված վարչական իրավախախտումների վերաբերյալ Հայաստանի Հանրապետության օրենսգրքի 63² հոդվածի 1-ին մասով:

Վարչական իրավախախտման վերաբերյալ գործի շրջանակներում ձեռք բերված ապացույցներով հիմնավորվել է, որ վերը նշված իրավախախտումների համար պատասխանատու անձ է հանդիսանում Ընկերության տնօրեն Անատոլի Վիկտորի Գոգոտինը: 2024 թվականի փետրվարի 8-ին կազմվել է վարչական իրավախախտման վերաբերյալ թիվ Գ/01-11 արձանագրությունը:

Անատոլի Վիկտորի Գոգոտինը պատշաճ ծանուցվել է վարչական իրավախախտման վերաբերյալ գործի քննության տեղի և ժամանակի մասին, չի ներկայացել գործի քննությանը և 2024 թվականի փետրվարի 20-ին ժամը 15⁰⁰-ին նշանակված գործի քննության օրը՝ Անատոլի Վիկտորի Գոգոտինի կողմից տրամադրված լիազորագրով, ներկայացել են վերջինիս ներկայացուցիչներ Արտյոմ Եղիշի Պետրոսյանը, Անուշ Ֆերդինանտի Գևորգյանը և Մակիչ Ժորեսի Մկրտչյանը (լիազորագիրը կցվել է գործին):

Վերջիններս ամբողջությամբ առարկել են սույն արձանագրված իրավախախտման հետ, հայտնել են իրենց մտադրությունը Ստուգման ակտը դատական կարգով բողոքարկելու վերաբերյալ, ինչով պայմանավորված խնդրել են հետաձգել գործի քննությունը, քանի որ վերը նշված վարչական ակտը բողոքարկելու դեպքում սույն վարչական վարույթը ենթակա կլինի կասեցման:

Սույն միջնորդության կապակցությամբ հարկ է համարվում արձանագրել, որ ՀՀ վարչական դատավարության օրենսգրքի 83-րդ հոդվածի 1-ին մասի համաձայն՝ վիճարկման հայցի վարույթ ընդունելը կասեցնում է վիճարկվող վարչական ակտի կատարումը մինչև այդ գործով գործն ըստ էության լուծող դատական ակտի օրինական

ուժի մեջ մտնելը: Միաժամանակ Վարչական իրավախախտումների վերաբերյալ ՀՀ օրենսգրքի 37-րդ հոդվածի 4-րդ մասի համաձայն՝ եթե վարչական իրավախախտումը հնարավոր չէր հայտնաբերել առանց համապատասխան ստուգումներ կամ դիտարկումներ կատարելու, ապա վարչական տույժը կարող է նշանակվել վարչական իրավախախտումը ստուգմամբ կամ դիտարկմամբ բացահայտելու օրվանից հետո՝ ոչ ուշ, քան երկու ամսվա ընթացքում: Հետևաբար, սույն Ստուգման ակտի դատական կարգով չբողոքարկելու պայմաններում, երբ առկա չէ դատական վեճ, Տեսչական մարմնի և Ընկերության միջև Ստուգման ակտի իրավաչափության կապակցությամբ և առնվազն առկա չէ համապատասխան հայցադիմումը վարույթ ընդունելու մասին ՀՀ վարչական դատարանի համապատասխան որոշում՝ գտնում ենք, որ սույն պայմաններում Ընկերության կողմից ներկայացված միջնորդությունն անհիմն է: Ավելին համաձայն Վարչական իրավախախտումների վերաբերյալ ՀՀ օրենսգրքի 37-րդ հոդվածի 4-րդ մասի՝ ստուգմամբ հայտնաբերված իրավախախտումների համար օրենսդիրը սահմանել է վարչական տույժի կիրառման վաղեմության ժամկետ, այն է՝ ստուգման ակտի կազմման օրվանից երկամսյա ժամկետը:

Վարչական իրավախախտման վերաբերյալ գործը քննելիս պարզվել է, որ Վարչական իրավախախտումների վերաբերյալ ՀՀ օրենսգրքի 33-րդ և 34-րդ հոդվածներով սահմանված մեղմացուցիչ և ծանրացուցիչ հանգամանքներ առկա չեն:

Ելնելով վերոգրյալից և ղեկավարվելով Հայաստանի Հանրապետության Վարչական իրավախախտումների վերաբերյալ օրենսգրքի 63² հոդվածի 1-ին մասով, 242-րդ և 282-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ընկերության գլխավոր տնօրեն Անատոլի Վիկտորի Գոգոտինի նկատմամբ Վարչական իրավախախտումների վերաբերյալ ՀՀ օրենսգրքի 63²-րդ հոդվածի 1-ին մասով սահմանված պահանջները չկատարելու համար կիրառել վարչական տույժ՝ տուգանք՝ սահմանված նվազագույն աշխատավարձի հինգհարյուրապատիկի չափով՝ 500 000 (հինգ հարյուր հազար) ՀՀ դրամ:
/վճարումը՝ 900005024063 հաշվեհամարին/

2. Սույն որոշումն ուժի մեջ է մտնում այն Անատոլի Վիկտորի Գոգոտինին հանձնելու (հանձնված համարվելու) օրվան հաջորդող օրը, կարող է վերադասության կարգով գանգատարկվել /բողոքարկվել/ Տեսչական մարմնի ղեկավարին՝ սույն որոշում հանձնելու օրվանից հետո 30 օրվա ընթացքում կամ դատական կարգով՝ ՀՀ վարչական դատարան՝ ուժի մեջ մտնելու պահից երկամսյա ժամկետում:

3. Որոշումն օրինական ուժի մեջ մտնելու պահից երկամսյա ժամկետում սույն որոշումը չբողոքարկելու դեպքում այն դառնում է անբողոքարկելի և ենթակա է հարկադիր կատարման:

ԳԵՂԱՐՔՈՒՆԻՔԻ ՏԱՐԱԾՔԱՅԻՆ ԲԱԺՆԻ ՊԵՏ՝

Ա. ՂՈՒԿԱՍՅԱՆ

